

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: —Ëbi chui beneta —caidquo nebi. —Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac —quequin Esus chuibenequidquo nebi. ² Con mado icbobimboecquid mibi neque. Mibi chuiquin nëid dada uanu, Timoteyo. —Nuquin Papan aton Mado Nuquin Icho Esuquidistubëdtan bëdamboen isquin bëdambo icmepashun —quequin mibi tantiembi.

Chieshtoenquo icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiacpadomboen natiadquo iquebi. Adquid icquin Nuquin Papa mibi chianembi. —Mibi tantiaquid Timoteyo bëdambo iquec, Papa. Adquo icmec mibi bëdamboshë iquec. Adquiouidi icmeta, Papa —quequin Nuquin Papa chianembi. ⁴ —Ëbi nidnu —quesho tantias mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵ Naden mibi tantiembi. —Aton chichi Doida caidën ani Eunisebëdtan aid daëdshumba Esus tantiabenquiacpadomboen Timoteyontsen nëbi Esus tantiaquiec —quequin mibi tantiembi. ⁶ Adquid icsho mimbi tantiondaid padpiden mibi chuinu. —Min Mayan

nëidbëd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibëd tabadmiac. Adoaid icquin dacuëdenquo icquin Esus chuibanta, mado. ⁷ ¿Nuquin Papan aton Mayan nuquibëd icmiacta nuqui natia dacuëdpe? Padenquo. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquo icquin mëmunquidquo icnuc nuqui bëdambo icmec.

⁸ —Adoaid nebi —qeshun dacuëdenquo icquin Nuquin Icbo Esus chuibanta. Adembidi dacuëdenquo icquin: —Pabado tantiaquiemi —cata. —Quënën nauedtsaid Pabado tantiatipi —quenda. Utsibon cuestiadquo icquin chieshënaqui Nuquin Papan namiacpadec chieshtoenquo icquin Esus chuibanuna. ⁹ Nuquin Papan: —Bëdamboec tabadquid icmequin con Mado Esus tantiamembi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquo. Ëdenquimboshë nidaidbëdta matses uabi Nuquin Papan: —Ëmbi chiaid niac-niaquec icsambo icboedëmbi con Mado Esus tantiasho cuidenquo iquendambi —quequin ambi chuipampicpadomboen nuqui Esus tantiamiac. ¹⁰ Aden ambi chuipampid tantiamiabi icshumbic nëbi Esuquidistu matsesmeshun matses tantiamiac. Adoac: —Abi tantiaquid unësacsho icsaido cuidacno nidmenquo icquin unëstiapimbo icquid icmequin Nuquin Papa

yacno abëdi Esuquidistun tabadmendac — quequin nuqui tantiec. ¹¹ Aden tantiaquin Esus chuibenequidquo nebi. —Ëbi chuibeneta — Esusën caondaid yec Nuquin Papabëdta Esus tantiamequidquo nebi. ¹² Aden chuibeneshobini chieshënquin quënën nauedondash. Ado aqui chieshtotiapimbo icquin Esus tantiembi. — Ëmbi tantiaidquo comapenen tantiaquin nabanquidquo Esus nec. Adquid icquin: “Ëbi tantienquo yanushe,” queshun abi tantiamequin ëbi chieshtomenquo iquendac. Nidaidën choabi icquin Esusën ëbi chieshtoenquo icquid icmendac —quec dacuëdenquo iquebi. ¹³ Tantia, mado. Mibi chuinu. Ëmbi abimbo chiondaidquo chuiban: —Nuquin Papan chiaidquo nec — queshun. Esuquidistu tantiaquinc matses tantiaquinc caquin adenuidi chuibanta, mado. ¹⁴ Nuquin Papan Mayan nuquibëd iqueque. Aidën namiac ëmbi chiondacpadomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ëmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. ¹⁶ Onesipodo caidën nëbi bëdamboen isposhi. Ëbi quënën nauedacsho dacuëdenquo icquin isuan-isuanquin bëdambo icmioshi. Adsho isun: —Aton shubun icquidobëdta aid bëdamboen ista, Papa —quequin Nuquin Papa chianembi. ¹⁷ Aidëmbi nëmbo shubu dadpen icquid Doma caid

yacno choboshon: —¿Mitsimbo Pabado icpec? —
 quequin yuen nibëbenequin istuidpondashi.
¹⁸ Mimbi isnubi Epeso yacnoshon aidëmbidi
 baded-badedquien nashundeniondashi. Adsho
 tantiashun: —Nidaidën padpidec choshon
 Nuquin Icbon Onesipodo bëdamboen ispashun
 —caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado.
 —Esuquidistun ëbi bëdamboen isec. Aidën bëdambo
 icmiac dayacquio icquin naimbi —queshun
 chieshtoenquo icquin Esus chuibanta. ² Matses
 dadpeshun tantianuc ëmbi chuibansho mimbi
 tantiondac. Ëmbi aden chiondaid utsibotsen
 chuiban. Adshun mimbi chuiboedo abentse-
 abentsen chuita. —Nëidën chieshtoenquo icquin
 Esus chuibantsiash —queshun: —Mimbitsen
 chuiban —cata, mado. ³ Sondado bëdambo
 icquidën nachimboen chieshtoenquo icquin
 bëdamboen nabanuna. Matsesën chieshënubi
 Esuquidistun chiacpadomboenuidi nanuna
 chieshtoenquo icquin. ⁴ Sondadon: —Mibi
 bëdambo iquec —camenuen aton chuiquid dapan
 chiacpadomboenuidi naquid. Ambi tantiaid
 nainquo icquinc utsibon chiacpadomboen
 nainquo icquinc caquin aton chuiquid
 dapan chiacpadomboenuidi naquidquo
 sondado nec. Adomboembidi Nuquin Icbon
 chiacpadomboenuidi nanuna, mado. ⁵ Ma
 nuquin matses titinquequidquo. ¿Mitsipadquo
 icpec? Aton uidën tanec aton matsesën

chiaction abia titinquec chosho: —Bëdamboec titinquiosh —queshun mauete menequid. Ambi chiaction titinquabi icsho mauete menenquio icquid. Adembidi: —Mimbi bëdamboen naoc —Nuquin Icho camenuen ambi chiacpadomboen chieshtoenquio icquin nabanuna, mado. ⁶ Ma nuquin matses tied uaquidquio. ¿Mitsipadquio icpec? Chonoadquidënquio dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquio icquin. Adoac utsibon Esus tantiabentsiash. ⁷ Aden ëmbi chuiboed tantiata. Adsho Nuquin Icbon mibi bëdamboen tantiametsiash.

Esuquidistu tantiata, quiaid

⁸ Utsibon chieshënnubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincuemënëdaidquio yec abi iquec. Aidquio tantiaquiota. Aid chuibenequidquio nebi. ⁹ Aden chuisho chieshënnquin bedshun icsambo icquid uidën uacbimboen shocosh nacnenaidën mëtaniac mëyadebi. ¿Ëbi aden uidën uacbimboenda Nuquin Papan chiaid uidën uapadic? Padenquio. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. ¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquio icquin abëdi tabadmendac —quec chieshtoenquio iccobi quënën nauedondaaid yequi. ¹¹ Naden abimbo chiaidquio tantiash chieshtoenquio iccobi.

—Abi bunaid ěnshun Nuquin Icbon chiacpadomboen naquid chieshěměnquiděn uněs uacsho Nuquin Icbon abi yacno abědi tabadmendac.

12 Utsibon chieshěnaqui chieshtoenquoio icquin Esus tantiec uněsash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ěmbi tantiacmaido neque. Něid nuquibědi tabadmenquien ictiad, Papa,” quequin Esusěn Nuquin Papa chiendac.

13 Aden abi tantiesabon ambi chiaid niacniacsho isun Nuquin Icho Esusěn ambi chiacpadomboen naquidquoio icquin icsaido cuidendac.

Adembidi ambi chiacpadomboen abi tantiaquido bědambo icmendac

—quequin chiaid tantiashun ambi chiacpadomboen naquin Esusěn naid chuibanuna chieshtoenquoio icquin.

Nuquin Papan chiaid isbanta, quiaid

14 Ěmbi dada uaqin chuiboed miběd icquido naden chuibanta, mado. —Nuquin Icbon nuqui isnubi Esusquoio chienquoio yec ambembi chiaid chiec mibi chushcananquieque. Adenda. Adec chushcanansho tantiash matses icsambo yanegue. Padi —cata, mado. 15 —Mibi bědambo iquec —Nuquin Papa camenuen bědamboen nata. —Dacuědtiapimbo iquebique. Ěmbi naid ma Nuquin Papan isnu —queshun adota. Ambi chiaid bědamboen isbanshun chieshtoenquoio icquin Nuquin Papan chiaidquoio chuibanta,

mado. ¹⁶ Ambembi chiaid chuiquidobëd onquec tabadenda. Adec onquequido icsambo icboedi buëdanquiec Nuquin Papan chiaid niac-niaquec icsamboshë yanegue. ¹⁷ Tosho bedacbimboec adquidën chiaid tantiaquido dadpen yanegue. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. ¹⁸ Aidon Nuquin Papan chiaidquio chienquio icquin muaquin chiec. —Esus tantiaquido unësabi icquido nëbimbobi uincuenac bimboec icpec. Unësacsho aton dada chuca uaqin uincuemenuo iquendac —quequin muaquin chuisho tantiashun utsibon Nuquin Icbon chiaid tantienquio yanac. ¹⁹ Aidon Esus tantiabien icchitash. Nuquin Papan Esus tantiamiac ënenquio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadombon: “ ‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icho Esus nec —queshun ambi icsamboen naid ënendac.

²⁰ Esus tantiaquido nadquio iquec. Shubu dapan tsitsan tabëcaid tabadac bimboecquid nec. Tsitsan abentse-abentsec icsactsëcquio icnubi utsi-utsiec bëdambo iquec. Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ënabi: —Esus tantianu —quetsëcquid iquec. ²¹ Esus tantiaquidquio ictiadquio yec: —Muaid chuisho tantiatiapimbo ic-

quin nēbi Nuquin Icbon chiacpadomboen nati-
adquoio iquebi —quiash Nuquin Icbon yuambo
yantsiash. Adsho Nuquin Icbon bēdamboen namet-
siash.

²² Caniabon mēmunenquoio icquin abi
bunacpadomboen naquid tanenda, mado.
Adenquoio yec bēdamboec tabadte bunquiota.
Nuquin Papan chiaid niacte bunenquoio yec:
—Nuquin Icbo Esus nec —quequidobēdtan
chieshtoenquoio icquin Esus tantiata. Matsesten
tantiec bēdamboec isnanec bēdamboec tabadta.
²³ Mibi yacnoshon ambembi chuiquidon: —
Mimbi icsamboen tantiec —canuen: —¿Mitsipaden
mimbi tantiape? —cac chienda. Adquidēn
chuisho tantiash matses chushcananondashe.
Aidēn chiac chienda. ²⁴ Nuquin Papan chiaid
chuihanquid chushcananenquoio icquid nendac.
Chieshēmēnenquoio icquin aton matses bēdamboen
isquid nendac. Adembidi nēishēnenquoio icquin
Nuquin Papan chiaid tantiamequid nendac.
Utsibon chieshēnaqui chieshēnanenquoio icquid
nendac. ²⁵ Esus tantiesabon: —Mimbi Nuquin
Papan chiaid chuisho tantiatiapimbo iquebi —
cac adembi nēishenquoio icquin Nuquin Papan
chiaidquoio chuihanendac. —Nuquin Papan ambi
chiaidquoio tantiamiac: “Icsamboen naombi,”
quequin ma Esus tantiesan tantiabenu —quequin
aden chuihanendac. ²⁶ —Aden Nuquin Papan
ambi chiaidquoio tantiamiac Esus tantienquoio
icboedēmbi Esus tantiabenshun abi yuaquidēn
Satanasēn namiaid ēnendac. Aden Nuquin
Papan chiacpadomboen naindac —qeshun
chieshtoenquoio icquin Nuquin Papan chiaidquoio

chuibanendac abi chuibanquidën.

3

Icsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshë icsamboshë iquendac. ² Nadquido iquendac. Nëidic utsi tantiatiapimbo yec abiuidtsëqui datantiadquido. Nëidic piucquid bedte comapenec bunquidombo. Nëidic: —Is. Ęmbimbo naiduidi bëdambo iqueque —quequido. Nëidic utsibo chieshë nec icsamboec onquequido. Nëidic amën chiaid niac-niacquido. Nëidic anin chiaid niac-niacquido. Nëidic aton na nashunaqui nashumënenquio icquido. Nëidic Nuquin Papan chiaid niac-niacquidombo. ³ Nëidic aton matses tantiesabo. Nëidic chiesh bëdanesabo. Nëidic muauanquido. Nëidic abi icsate bunaid ënenquio icquido. Nëidic cuesanquido. Nëidic bëdambo icquid chieshënquido. ⁴ Nëidic bëdambo icquid damianquiashic cuesunianquido. Nëidic bëdamboen tantienquio yec badedi icsa uanquido. Nëidic: —Ębiuidtsëqui bëdambo iquec —quec abibi tantiadquido. Nëidic ambi naiduidi bunquin Nuquin Papa tantiesabo. ⁵ Nëidic: —Nuquin Papa tantiaquid nebi —quec muaquin aidën chiaid niac-niacquido. Adquidtedi icsambo icquido nec. —Adquidbëduidi onquec tabadenda —cäimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoudquio icnubi shubun puduedshun ambembi chiaid chuibanac caosh. Aden chuisho

tantiashun: —Padi —catiadquidi chidon: —Mimbi chiaid tantianu —quequin badedquo tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. ⁷ Aden icsambo icquidën ambembi chuidenesho tantianeshun Nuquin Papan chiaidquo tantiatipimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsëc Canes cuëmëdnubi utsi Mambades cuëmëdpampic. Isadaidbo tsusedpa Moisesën Nuquin Papan chiaidquo chuisho tantiashun aidon: —Mue nec. Ëmbimbo comapenen tantiaquin ismenu —queboedombi bëdiactsëc tantiaquin nacenuidpampic. Adsho isun: —Abimbo cainquo iccosh. Muachitosh —capampic matsesën. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bëdamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

Nuquin Papan chiaid isbanec bëdamboec tabadte

¹⁰ Ëbien muaquidpenquo nec. Ëmbi naid ma mimbi tantieyoc. —Ma Èsus tantianu —quequin Èsusën naid chuibanec bëdamboec tabadondabi. Èsus tantiaquidquo icquin matses tantiaquin Èsusën naid chuibeniondambi. Chieshënaqui chieshtoenquo icquin adembi chuibeniondambi. ¹¹ Ëmbi aden chuibansho isun chieshënondashi. Shubu dadpen icquid Antioquiya caid yacnoshon ëbi: —Cuesnu —casha Nuquin Icbon nac padenquo icpondash. Adshumbic shubu dadpen

icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquoio bedshun cuēnoten se-sequin unēs uatsempondash. Adsho Nuquin Icbon nac unēsenquoio iccondabi. ¹² Ēbipadquido Esus tantiaquidotedi bēdamboec tabadtiadquio icsho adembidi utsibon comapenen chieshēnendac. ¹³ Padnuen chieshēmēnquidobēd bēdambo icquid damianquieci muaquido bēdiactšec icsambo icboedi muauananquieci buēdanquieci icsamboshē yanendac.

¹⁴ Mibi adquidpenquoio nec, mado. — Ēmbi isondaidon bēdambo icquidon abimbo chuibanondashi —quec Nuquin Papan chiaid niaquenquoio yec bēdamboec tabadta, mado. ¹⁵ Ēnden bacuēmpi icquin Nuquin Papan chiaidquio min matsesēn chuibanšho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabenēdac. Aden Nuquin Papan bēdamboen iste tantiametembo Nuquin Papan chiaid nendac. ¹⁶ Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdamboshē iquec. Aid isec onquequin: —Nuquin Papan chiacpadece bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec. ¹⁷ Nuquin Papan: —Ēmbi chiaidquio tantiashun Esus tantiaquinc matses nashunquinc

caic Esus tantiaquido ma bēdamboec tabadnu
—quequin ambi chiaidquio dada uamepampic.

4

Nuquin Papan chiaid chuisho tantienquio yaid

¹ Nuquin Papabēdtan Esuquidistun mibi iseque. Bēdamboen nata. Esusēn nidaidēn padpīdec choshon abitedishun Icbombo icquin unēsaido uincuemiado unēsabi icquidobēdta chiendac. —Nēid ēbi tantiaquid ēbēdi tabadmembī. Nēid ēbi tantiesa cuidembī —quequin chiendac.

² Aidēn chiacpadomboen naquin Nuquin Papan chiaidquio chuibanta, mado. Matsesēn tantiatiadquio icnuc adota. Tantiatiapimbo icnubi adembī chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquio icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenquio icquin chuita. Bēdiactsēc tantiatsēcquido: —Ēsus tantiaquidon nadoquid —quequin chuibanta, mado.

³ —Yuecshun Nuquin Papan chiaidquio matses dadpenshun tantiatiapimbo iquendac —queshun nata, mado. Aden tantiatiapimbo icquidēn Nuquin Papan chiaidpenquio chuisho tantiash: —Mimbi ēbi bunaidquio chuisho tantianu. Ēbi chiec cho —quequin muaquid utsi-utsien abi yacno puduedmendac.

⁴ Pamumēdacbimboecquin Nuquin Papan chiaid tantienquio icquin tsusedpabon ambembi chiampīduidi tantiendac. ⁵ Aidēn nacpadomboen

nainda, mado. Nuquin Papan chiaidquio bēdamboen tantiaquid yec bēdamboec tabadta. Adsho utsibon chieshēnaqui chieshtoenquio icquin Esusquio tantiata, mado. Adembidi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

⁶ —Ēbi unēs uan ěmbi nacpadomboen: “Adota,” mibi caquid nibēdtsiash —queshun mibi aden chiec nebi. Nēbi Nuquin Papan tantiacpadēn chieshēmēnquidon ěbi unēs uaic.

⁷ Utsibon chieshēnubi ěnenquio icquin Esusēn naid chuibeniombi. —Ēbi bunaid bednu —quec comapenec titinguiacbimboen dayacquio icquin Nuquin Papan chiaidtedi naombi. Chieshtoenquio icquin Esus tantiaquidquio nebi. Adshobini nēbi unēs uaic. ⁸ Unēs uacshobini matsesēn naid abitedimbo tantiaquidēn Nuquin Icbon: —Ēbi tantiaquin ěmbi chiacpadomboenuidi naic mibi bēdambo iccoque. Nuquin Papa yacno ěbēdi tabadmequin mibi bēdamboshē icmendambi —caindac. Abi chote ushēn choshon aden Nuquin Icbon ěbi chiendac. Adembidi abi chosho iste bunquidotedi abi tantiaquido Nuquin Icbon abēdi tabadmendac.

Timoteyo: Cho, caid

⁹ Nēbimbobi ěbi isec cho, mado. ¹⁰ Utsibo nidanebon ěbentsēqui tsadebique. Demas caid aton na bedteuidi bunec ěbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon ¹¹ Ducas

abentsëqui ëbëd iquec. Madcos bedbëtsenec cho, mado. Ëbëdtan aidëmbi nëshunquio Esus chuibantsiashe. ¹² Tiquico caid Epeso yacno mibi yacno nidmiombi. ¹³ Shubu dadpen icquid Todoas caid yacno Cadpo cuëmëdquidën shubun con na niamëdacondashe. Con dashcute ëmbi dada uaidbëdta bedbëtsenec cho, mado. —Abitedi buantiapimbo iquebi —qeshun nëish yua bitsi nacnenaïd dada uaiduidtsëqui bëta.

¹⁴ Shocosh nacnenquidën Adecandedo caidën comapenen chieshënondashi. Aid Nuquin Papan cuidendac, mado. ¹⁵ Nuquin Papan chiaïd ëmbi chuïsho tantiatiapimbo icquin icsamboen chuïshunondashibique. Choquin aid isenda: —Ëbitsen icsamboen chuïshunushe —qeshun. ¹⁶ Ënden tauamboen bedshun: —Quënën nauednu —cac cuidte chuïquid dapa ëmbentsëqui chuïbampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpenshun: “Bëdambo icquid nec,” quequin ëmbi naïd chuïbanac ëbi quënën nauedquidon ëbi nidmetsiash —qeshun ëbëd icboedo: —Chiec cho —caqui choenquio iccondash. Aden ëbi cacuidondaïdo tantiaquin: —Nuquin Papan aïdo cuidenquio icpashun —caïmbi. ¹⁷ Nuquin Icbombini nïanenquio iccondash. —Isadaïdpembo matses utsibo ma ëmbi naïd chuïbenenu —quequin cuesambo icmepondashi. Adondaïd icshobini chieshëmënquidon: —Cuesnu —cabededpondash. Nuquin Icbon nac aïd matsesën unës uainquio icpondashi. ¹⁸ Padpiden chieshëmënquidon

ëbi caic: —Ma mëyanac chieshtoshon Esus tantienquoio yanu —casha Nuquin Icbon nac chieshtoenquoio ictsiabi. —Nuquin Icbombidi abi yacno ambi matses dadpen namiacno abëdi ëbi tabadmendac —queshun: —“Nuquin Icho bëdamboshë iquec,” canuna ënenquoio icquin —caimbi.

¹⁹ Mibi yacnocquido: —Mibi caic: “Unësquoio iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aidtedi aden chuiban. ²⁰ Mimbi ison daid Edasto caid shubu dadpen icquid Codinto yacno tëshëdondash ëbi chonoc. Utsibic Tëdopimo caid aton dada icsabudacsho shubu dadpen icquid Mideto caid yacno nianondambi. ²¹ Ue tsasi iquenuanquid taënushe. Baded cho, mado. Doma yacnocquido nëmbo icquidon: —“Timoteyo unësquoio iquec,” quequin dada ua —caposhi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido ut-sibotedi. Aidtedi adosh. ²² —Nuquin Icho Esusën abëd icquin con mado bëdamboen ispashun —quequin mibi tantiembi. Padi. Aidtedi chuiquin dada uaombi, mado.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

446da786-5bd1-5ffa-85e2-9eff4052cf8b